

# KI SAMLA NONGLAMKTIEN

Ishu No. 02

Nailur, 2020



“Hynrei U Trai U la ong ia nga, Wat ong Nga dang khyannah: naba ha kino kino kiba ngan phah ia me men leit keiñ, bad ia kaei kaei kaba ngan hukum ia me men kren keiñ.”

Jeremaiah 1:7

# KI JINGKDEW

- |  |     |       |
|--|-----|-------|
| 1. Ha ka por mynbarim...                   | Sla | 1-5   |
| 2. U Hudson Taylor                         | Sla | 6-9   |
| 3. Ai rong ianga                           | Sla | 10    |
| 4. Pyrshang ianga                          | Sla | 11    |
| 5. Airong ianga                            | Sla | 12-13 |
| 6. Pyrshang ianga                          |     | 14    |
| 7. Ki dak jong ka jingwan arsien U Jisu    | Sla | 15-16 |
| 8. Ki khubor na u khulom ka Ellen G. White | Sla | 17    |



# Ka por jingiathuhkhana

## Ha ka por mynbarim...

La don iwei i khynnah kynthei i ba la shong trei ha ka iing jong uwei u rangbah shipai ha Syria. Ine i khynnah i la dei i nong Israel i ba la shah ring mraw noh sha ri Syria. Ka Baibl kam iathuh ia ngi ia ka kyrteng jong ita i khynnah hynrei ka iathuh ba ka kyrteng jong utei u rangbah shipai ka dei



u Naaman. Une u la long u briew uba don bor bha bad uba la ioh bha ia ka jingsngewbha jong u Syiem ka Syria naba u la long u briew uba shlur

bad u la jop bun ki thma. Ka la don pat kawei ka jingduna ha u Naaman. U la don ia u ñiangthohlieh.

Ka kam jong itei i khynnah ka la long ba in shakri ia ka lok jong u Naaman hynrei man la ka sngi i juh iohi ia ka jingpang jong u kynrad jong i bad i juh isynei bha ia u. Kumta, ha


kawei ka sngi ine i khynnah trei i la ong ha ka trai ka jong i ba lada u lok jong ka un leit sha u nongiathuhlypa jong U Blei ha Samaria, un ioh ia ka jingpynkhiah. Ine i khynnah i la ngeit ba U Blei Un ai bor ha uta u nongiathuhlypa jong u ban pynkhiah ia une u rangbha shipai uba khraw.



Ki ktien jong ine i khyannah ki lah poi sha ki shkor jong u Naaman bad jong u Syiem. U Syiem u la ong ha u Naaman ba udei shisha ban leit wad jingpynkhiah katkum ki ktien jong itei i khyannah hynrei ba un da leit, u dei ban rah da ka shithi na u Syiem ka Syria ban ai ha u Syiem ki Israel ban batai ia ka jingthmu jong ka jingleit jong u khang ba kan ym mih kano kano ka jingkulmar ne jingiasngewthuh bakla.



Ki la ia pynbeit ia ka sngi bad u Naaman bad ki nongbud jong u ki la ia mih ban leit sha ri Israel, ki da rah ruh bun ki jingai sngewbha na ka bynta uta u nongpynkhiah. Ynda ki la ia poi ha ri Israel, ki la ia ai ia kata ka shithi ha u Syiem bad hadien ba u la pule ia kane, u la patar ia



la ki jaiñ. Balei? Phi i, u Syiem ka Syria u la thoh hangta ba u phah ia u Naaman sha ri Israel khnang ba u Syiem ki Israel un pynkoit ia u! Kane ka la pynkyndit bha ia une u syiem bad u la ong, "Nga long U Blei mo, uban pyniap bad uban pynim, ba

une u briew u phah ha nga ban pynkoit ia u briew na u ñiangthohlieh jong u?" U Syiem ki Israel u la pyrkhath ba tharai u Syiem ka Syria u la shu pyrshang ban pynmih jingiakaja hapdeng kine ki hima naba la bun sien ki juh ia leh thma pyrshah iwei ia iwei.

U Naaman bapli u la jan leit phai sha la ri kumjuh kumba u mih na ka. Hynrei u Elisha, u nongiathuhlypa U Blei, u la iohsngew ia kaei kaba la jia bad u la phah ktien sha u syiem da kaba ong, "Balei ba me la patar ia la ki jaiñ? To ai ba u Naaman un wan sha nga



bad un ioh tip ba u don u nongiathuhlypa ha Israel." Kumta, u Syiem u la phah ia u Naaman sha u Elisha. Ynda u la poi ha ka jingkhong ka jong u, u Elisha u la phah da u nongtrei jong u ban ong ha u Naaman ba u dei ban leit sait leit sum bad pyngam ialade hynñiew sien ha ka wah Jordan khnang ba un ioh ka jingpynkhiah. U Naaman um shym la khmih lynti ia kum kane ka rukom ai jubab. U la wan ia id lynti kaba jngai bad u la khmih lynti ba une u nongiathuhlypa un wan iakynduh mar khmat ia u bad un buh ia ki kti halor jong u bad pynkhiah ia u. U Naaman u la kiew jingbitar bad u la kut jingmut ban leit phai noh. Halor kata u la



pyrkhat ba ka wah Jordan kam dei kaba bha kum ki wah ha Damascus ba un leit sum hangta. U la don ha lynti ban leit phai noh sha la shnong haba uwei na ki nongbud jong u u la ong, "Ko kpa, lada uta u nongiathuhlypa u la hukum ia me ban leh kaei kaei

kaba khraw, men ym da leh ia kata? Sa katno lei lei, haba u shu ong ha me, To sum, bad to long khuid?”.


U Naaman u la sngew shon da ka jingai jingmut jong une u briew bad kumta u la leit sha wah Jordan bad u la sum bad pynngam ialade hangta. Nga lah ban shu mutdur ia ki kynhun jong une u rangbah kiba la ia ap ban iohi ia ka kambah jong ka jingpynkhiah jong u. Ha ka sien ba nyngkong ba u la ngam, ka khlem jia eiei; ka sien kaba ar - pat jia eiei,

ka sien kaba lai- pat jia hi kaei kaei, ka sien kaba saw- pat don jingpher eiei ruh em hynrei hadien ka sien kaba hynñiew ba u Naaman u la ngam, u la mih pat ha ka jingshahpynkhiah! Ka sniehdoh jong u ka la long kum ka jong u



khunlung. U la dap da ka jingkmn kaba khraw. U la mih pynstet na kata ka um bad u la leit sha u Elisha bad tyrwa ia u ia kita ki kshar, ki rupa bad ki jaiñ bha kiba u la wanrah na Syria hynrei u Elisha um shym la treh ban shim naba u nongpynkhiah um shym la dei ma u hynrei U Blei. Ma u hi, kum u nongiathuhlypa, u shu long tang u atiar uba U Blei U la pyndonkam ban leh ia ka kam bah. Da ka jingainguh kaba khraw u Naaman u la kular ba un ym ai shuh ia ki jingainguh jong u sha kino kino ki blei hynrei tang sha U Blei ki Israel. U la phai pat ban leit noh sha la ri da kaba hun ka mynsiem halor ka jingpynkhiah kaba u la ioh. Hynrei haba u khlem pat la ia id jngai, u la shah pynsangeh da u Gehasi, u nongtrei jong u Elisha. Une u la iohi ia kita ki jingaisngewbha kiba u Naaman u la tyrwa ha u Elisha bad u la iohi ba u kynrad jong u u la

kyntait na kaban shim ia kitei  
ki jingai u Naaman. Kumta u  
Gehasi u la i kwah ia kitei ki  
tiar ialade, wat lada u ioh tang  
khyndiat ruh. U la ong ha u  
Naaman ba wat la u Elisha um  
shym la treh ban shim ia kita ki  
jingaisngewbha jong u, ki la wan  
poi pat arngut ki samla ha ka



ïing jong u bad kumta u Elisha u kwah ban pan na u Naaman ba un ai  
katto katne ka rupa bad arriam ki jaiñ na bynta kine ki briew. Khlem  
da tip ia ka jingshukor jong u Gehasi, u Naaman u la ai sbun ia kita ki  
tiar na bynta kita ki arngut ki samla.

Ynda u la poi ha ïing, u Elisha u la kylli ia u Gehasi shano u la leit hynrei  
u la thok bad ong ba um shym la leit shaei shaei ruh. U Elisha u la ong  
ba u la tip mynba u Gehasi u la leit beh nadien u Naaman ban pan ia  
kita ki tiar na u bad u da ong ruh ba namar u Gehasi u la long uba  
khwang tang ialade bad uba lalot, u ñiangthohlieh uba la don ha u  
Naaman un poi noh ha u bad ha ki pateng jong u junom. Naduh kata ka  
por u Gehasi u la 'lieh kat ka ior' na uta u ñiangthohlieh.❤️

To Pyrkhat Halor Kine:

- Hato ita i khyannah i ngeit ha U Blei? Hato i dang ngeit ha U wat haba i la shah tan mraw noh sha ka ri nongwei?
- Hato i la sngew kynjah?
- Hato phi tharai i la trei bha ia ka kam? Kumno ba i la lah ban kren laitluid bha bad la ka trai shaphang u Naaman?
- Hato ngi lah ban ong ba ka jingngeit jong itei i khyannah ka la long ka jingkyrkhu ia kiwei de kumba ka la long ia i?
- Hato phi tharai ba ine i khyannah i la long i nonglam ktien i ba shisha jong U Blei wat haba i trei kum ka shakri?

## U HUDSON TAYLOR

Da i Avery Foley bad i Mariah Smith ha ka 18 tarik u Nailur, 2017

Ha u snem 1832 la kha ia uwei u khun shynrang ha England. Ki kmie ki kpa jong u ki la dei ki Khristan bad ki la dwai sha U Blei, "To ai ba une un leit trei na bynta jong Me sha China." Une u khunlung u dei u James Hudson Taylor. Wat haba u la heh la san haka longiing Khristan, um shym la ngeit ia ki jinghikai jong ka Baibl tat haduh ba un da dap 17 snem ka rta. Ka jingrai jong u ban bud ia U Jisu ka la jia shibnai hadien ba ka para jong u ka la kut jingmut ban dwai man la ka sngi na bynta jong u.



Ha kata ka por, u Hudson Taylor u la sngew ba U Blei u la khot ia u ban leit trei kum u mishonari sha ri China kaba long ka jaka kaba da ki phew lak ki briew kim pat shym la iohsngew shaphang u Khrist.

Hadien ka jingshahkhot ha U Blei, u Hudson u la sdang ban pynkhreh ialade. U la leit shah hikai ia ka ktien 'Mandarin' kaba long ka ktien ki nong China bad u la leit shah hikai ruh ban long doktor ban iarap ia ka jingdonkam ba kynja met jong ki briew. Ban pynkhreh ialade na bynta ki jingeh kiban sa wan, u la bam da ka ja bad u kynja kew (oatmeal) bad u la ai noh ia bun ki tiar ki tar ki jong u. U da shaniah ruh ha u Blei hi ban pyndap ia ki jingdonkam jong u. Mynba u la dap 21 snem, u la leit sha China bad pyniasoh ialade bad ki mishonari kiba don tang khyndiat ngut kiba la trei ha katei ka ri.

Hadien ba u la poi ha China, u Hudson u la sngewthuh ba ki nong China kim shym la sngap ia ki mishonari phareng namar ba ki i kynsha ia ki naba ki la i pher eh ha ka rukom riam bad rukom khap sñiuh. Kumta u Hudson u la sdang ban phong da ki jaiñphong ki nong China bad u la



thaiñ jrong ruh ia u sniuh jong u kum ki riew rangbah China. Bun na ki para mishonari ki la kyndit ia kane ka jingleh ka jong u hynrei katei ka la pynlong ia ki nong China ba kin sngap!


U Hudson u la i khuslai haba u peit ia ki mishonari kiba la don lypa ha China. Kine ki la kwah ban kham trei bad ki nongkhäii phareng kum ki nongpynkylla ktien na bynta jong ki, ban ia kaba ki iarap ia ki briew bad iasam ia U Jisu. Da kaba sngewsih U Hudson u la leit rung sha ki jaka kiba kham pajih shapoh ka ri China. Ha kane ka por um pat shym la sngewthuh bha ban kren ne thoh ia



ka ktien ki nong China hynrei u la shaniah ha U Blei ba Un lam lynti ia u. U la trei bad uwei u paralok mishonari jong u da kaba iasam ia ki Baibl ha ka ktien China bad u la trei ruh kum u doktor.

Ha u snem 1857 ka Chinese Evangelization Society kaba la phah ia u Hudson sha China ka khlem shym la lah shuh ban siew ia ki mishonari jong ka. Kane ka la pynsngewsih ia u Hudson bad u la ieh noh ia katei ka kynhun. U la kut jingmut ruh ba un shaniah beit thik ha U Blei ba Un pyndap ia ki jingdonkam jong u ha ka kam ha China. Katba u la trei shitom, i la mih i kynhun i ba rit rynkat bad ka jingngeit jong u Hudson. Ha u snem 1860 u Hudson u la shitom jur bha bad u la hap leit phai sha ri Bilat. Katba u dang ioh jingsumar hangtei, u la iasam bad ki para Khristan lajong ia ki jingdonkam ba kynja mynsiem jong ki nong China. U da pan shuh ruh na U Blei ia ki mishonari ban leit sha ki jaka kiba kham shapoh jong ka ri China bad ym tang ha ki jaka ba don hajan duriaw. U la bteng ruh ban pynkylla ia ka Baibl sha ka ktien Chinese.

U Hudson u la sngew diaw halor ka jingbysalia jong ki phareng ia ki briew ka ri China. Ban kdew ia kane ka mat, u la thoh ia ka kot China's Spiritual Needs and Claims. Ban iarap pat ban pynpoi ia ka gospel sha ki jaka kiba kham shapoh jong ka China, u Hudson u la sdang ia ka China Inland Mission. Khathynriew ngut ki briew ki la iasoh bad kane ka mission bad kila ia mih bad u Hudson ban leit sha China.



Ban iasoh ialade bad ka China Inland Mission ki mishonari ki hap ban mynjur ba kin phong ia ki jaiñ ki nong China bad kin teh sñiuh ruh kum ma ki. Kin ym pdiang tulop lane pan pisa nano nano ruh hynrei kin shaniah beit ha U Blei ba Un pyndap ia ki. Bad U Blei U la leh shisha kumta! Ine i mission i ba rit i la san bad katba u Hudson un iap, la don 825 ngut ki mishonari kiba la shakri ha ki jaka bapher bapher jong ka ri China, 300 tylli ki iing mission, 500 ngut ki nongiarap trai shnong (nong China) bad palat 25,000 ngut ki nong China kiba la long Khristan thymmai.

U Hudson u la hap ban len bun kiei kiei ban rah ia ka gospel sha China. Ka lok nyngkong jong u ka la iap khyannah bad saw na ki phra ngut ki khun jong u ki la iap ha ka por ba ki dang ia rit bha. U Hudson malade ruh u la shitom na ki jingpang bapher bad na ka jingsngewsih. Hynrei u la tip ba ka kam jong u ka long kaba donkam bad kaei kaei ba u leh na bynta U

Jisu ka long kaba shongdor haduh katta katta. Ka gospel ka la leit sha ri China bad ka balang ha ka ka nang iai san namar ka jinglen bad jingtrei jong ki briew kum u



Hudson. Mynta iaka mission jong u Hudson la tip kum ka Overseas Missionary Fellowship International. Kane ka dang iai trei ban lam ia ki brier ka ri Asia khamjan sha U Blei. ❤️

To pyrkhath Halor Kine:

- Hato ngi ioh tang ki jingkyrkhu haba ngi shakri ia U Blei?
- Hato ngi lah ban sngew sheptieng lane sngewduh jingkyrmen haba ngi shakri ia U Blei? Hato kane ka long kaba bha lane kaba sniew?
- Hato U Blei u donkam ia ngi ban len ia kiei kiei khnang ba ngin shakri ia U?
- Hato ngi lah shisha ban shaniah ba U Blei Un pyndap ia ngi wat hapdeng ki por ki ba eh bha?
- Kiei kita kiei kiei kiba kongsan bha ha ka jingim jong phi? Hato phin klo i ban len ia kita lada U Blei U khot iaphi ban leh kumta?

Ia katei ka jingiathuhkhana la shim na:


<https://answersingenesis.org/kids/bible/world-missions/hudson-taylor/>

ha u Nailur 02,2020.

# AI RONG IANGA



Hato phi lah ban shem ia kithie ki tiar ha katei ka dur haneng?




La shim ia katei ka aktibiti na [www.answersingenesis.org](http://www.answersingenesis.org)

# PYRSHANG IANGA

Pyrshang ban poi sha kaba kut jong kane ka jingiaid lynti kaba khyllaiñ.  
Sdang na ki kti kiba duwai.

## Lord's Prayer Maze

Our Father who art in heaven,  
hallowed be thy name.  
Thy kingdom come.  
Thy will be done...



# AI RONG IANGA



I can follow Jesus by sharing.

Nga lah ban bud ia U Jisu da kaba nga iasam ia kiei kiei kiba nga don

AI RONG IANGA



Nga lah ban bud ia U Jisu da kaba nga iarap ia kiwei

# PYRSHANG IANGA

Pynbeit ia kitei ki ktien harum ban ioh ia ka khubor na U JISU

jong khmih wan; bad ka jong nga ka lem bad nga,  
kloi ban don ai nga nong ha kumba uwei pa uwei  
baroh kat long ka nong u. Ha jingleh

(Ka Jingiarap: Jingpynpaw 22:12)

---

---

---

---

---

---

---

---

---

---

---

---

---

---

---



## KI DAK KA JINGWAN ARSIEN U JISU



Katba u Jisu bad ki synran jong U kila iashongkai ha u lum Olib, Ki synran ki la kylli ia U kiei kita ki dak jong ka jingwai noh ka pyrthei bad ka jingwan arsiens jong U.

U Jisu U la jubab bad ong ha ki ba ha shuwa ba Un wan, kin don bun kiba kam ba ki long U Khrist hynrei ngim dei satia ban ngeit ia ki lane ban leit bud ia ki. U Jisu U la maham ba kin don ki jingiaphngan, ki jingpang bad ki jumaiñ. Ka pyrthei kan long kaba dap tang da ka jingkulmar bad jingsheptieng suda. Ka jingieit jong ki briew kan pjah. Bun na ki kin shet kylla ia la ki paralok, khamtam eh ia ki paralok kiba ieit bad bud ia U Jisu. Ki nongbud jong U Khrist kin shah isih bad kin shah pynshitom namar jong U. Hynrei hapdeng kine ki jingjia baroh, kin don bun ki briew kiban ioh tip shaphang U Jisu bad ka Hima ka jong U. U Jisu U la ong ba ha shuwa ba Un wan, kin don ki por kiba eh haduh katta katta kiba ka pyrthei kam pat shym la iohi. Ki briew jong U Blei kin hap ban phet bad rieh naba kin shah beh kum ki nongpynkheñ aiñ bad ki nongpynkulmar. Ka sngi bad u bnai kin ym shai mynstep bad mynmiet bad ki khlur kin hap na ka sahit bneng.

Kine ki sngi kin long kiba shyrkhei haduh katta katta ba lada U Blei Um pynlyngkot ia ki, yn bun ki jingim briew kiban duh noh. Hynrei U Blei

Un pynlyngkot ia kitei ki sngi ka jingjynjar na ka bynta ki briew ki jong U bad U Jisu Un wan bad ki kynhun ka bneng ban shim ia la ki briew bad ialam noh ia ki sha bneng. Kumba ka sngi ka mih na mihngi, kumta ruh U Khun U Blei Un wan paw na mihngi bad baroh ki khmat kin iohi ia u ha ka burom ka jong U. ❤️



To Pyrkhat Halor Kine:

- Ha kine ki sngi, hato phi iohi ia ki dak jong ka jingwan arsien U Jisu? Hato phi lah ban niew kiei kita?
- Hato phi tharai ba ka jingwan arsien U Jisu kan long kaba jar jar?
- Hato phi dei ne em ban khmih lynti ba phin shah isih bad shah pynshitom na bynta U Jisu?
- Kumno phin lah ban ieng skhem na bynta U Jisu wat ha ki por kiba eh bha? Hato phin lah ban leh ia kane da lade? Phin donkam aiu ban lah ban ieng skhem?

## KI KHUBOR NA U KHULOM KA ELLEN G. WHITE

"U Trai U la thung ia ki samla ban

long ki nongiarap jong U.... Ngi

kwah ia ki khun jong ngi ban

ngeit ia ka jingshisha. Ngi

kwah ba kin long kiba shah

kyrkhu ha U Blei. Ngi kwah

ia ki ba kin don kti ha ki kam

kiba ryntih bad kiba beit ban

iarap ia ki para samla. To ai ba

baroh kin shah hikai ba kin mihkhmat

na bynta ka jingshisha da kaba ai ia ki nia jong ka jingkyrmen

kaba don hapoh jong ki bad da kaba pyndonburom ia U Blei ha

kano kano ka kam ha kaba la khot ia ki ban trei."



- Ka Jingshakri Khristan, Lynnong 2 ❤️

## LA PYNMIH DA KA CHRIST IN YOU MINISTRIES

Ia ine I kot lyngkdop ki khyannah la pynmih man la u bnai bad ym donkam siew eiei ruh ban ioh ia i. La pynmih ia ine I kot ban iarap ia ki khyannah ba kin tip shuh shuh ia ki jingshisha bad jingngeit ka Baibl. Ine I kot ilah ruh ban iarap ia ki kmie ki kpa haka jinghikai jongki shaphang ka Baibl ha ki khun ki kti jongki. Kumta la kyntu ia ki kmie ki kpa bad ki khyannah ruh ban iasam ia ine i kot naba "phi la pdiang ei, phin ia ai ei."

Ban ioh ia ine i kot phi lah ban phone iangi ha kine ki nombar harum:

+91 8794262391

+91 8258877230

+91 7005673218

+91 7005910655

Lane, phi lah ban thoh sha: [ciyministries04@gmail.com](mailto:ciyministries04@gmail.com)

Phi lah ruh ban shem sa ia kiwei kiwei ki jingpynmih jong ngi bad ki jingthoh jingtar kiba phi lah ban ioh khlem da hap ban siew lyngba kine ki lad harum:

Website: [www.christinyouministry.info](http://www.christinyouministry.info)

Facebook Page: [Christ in you Ministries- khasi](#)

Ngi khmih lynti ban iohsngew na phi!